

四庫全書

集部

欽定四庫全書

世宗憲皇帝御製文集卷二十三

詩
雍邸集

望海樓二首

凌霄雄傑聳層樓，碧海蒼茫遠望收。
混一乾坤雲水闊，濯磨日月浪花浮。
百川輪委盈襟帶，萬類涵濡任泳游。
聞道此中覃帝澤，幾曾汪濊有停流。

其二

朱欄畫棟最高樓海色天容萬象收海底魚龍應變化
天中雲雨每蒸浮無波不具全潮勢此日真成廣漢游
仙客釣鰲非我意憑軒惟是羨安流

瞻仰盛京宮闕念

祖宗創業艱難恭賦二十韻

奉

命趨遼海猗歟仰舊宮遙迤龍脈遠跼蕩鳳城雄念昔
開洪造乘時建武功師征方自葛考卜重遷鄴一劍風

塵際三陲指顧中神威宣率土

皇極協蒼穹式廓彌增壯維垣遂克崇八門連閫域雙
闕竦高空曳珮千官列輸琛萬國同兵農咸定制禮樂
漸移風爰及純熙介覃敷景歷融霽區欣奠鼎故里抱
遺弓沛邑恩優渥春陵望鬱葱星躔爭拱北王氣本從
東綿瓊鍾靈盛凝庥後裔蒙

聖慈殷孝享

敕諭遣微躬肅覩興京勝恭承祀典隆丕基勞櫛沐奕

葉荷幘幘松檟靈祇護檐楹肱肱通

祖宗光烈在明發惕愚衷

曉度杏山

曙色催樵牧山崖徑鬱盤霜凝鴉背白沙印馬蹄乾海
氣籠朝旭林飈送早寒鳳城清漏隔遙憶

寢門安

望醫巫閭山

翠黛滿雲封遙看北鎮雄壯觀伴五嶽峻秩比三公葱

鬱興王氣扶搖廣莫風
勃銘維

祖烈瞻仰萬年同

渡句驪河

遼水東西岸寒雲接渺茫
平沙留鴈跡堠火靖龍荒
木落晴巒出冰堅雪練長
經時疎定省望日陟高岡

謁

福陵恭頌

一峰天柱象崑崙聖武開基百世尊

廟貌輝煌蔽劍舄塵氛盪滌闢乾坤赤龍遐舉雲留影
石馬宵趨汗漬痕赫濯聲靈通倭肅春秋霜露感長存

謁

昭陵恭頌

鍾靈毓秀氣佳哉宇宙從茲景運開

帝統兼因文治廣

聖基宣獨武功恢遼韓海水涵深澤松杏山高接上台

虔肅奉觴恭拜畢五雲飛處久徘徊

避暑口外

爽塏高原古上都鬱蒸節候熱全無千尋木蔭招涼扇
幾道泉飛辟暑珠時任鏤冰為鳥獸灣從銷夏泛菰蒲

銷夏灣在吳郡洞庭西山何如此地隨

仙蹕披拂清風勝舞雩

口外山村

鳥外窺烟樹微茫磧路斜地寒宜種黍坡暖好栽瓜
比戶裁駝褐居人置兔罝誰將淳朴意傳寫入中華

田家即事二首

沙磧高低禾黍盈，羣飛銅雀繞田鳴。
竹弓蒿矢堪驅嚇，漫向黃雲試射聲。

其二

戍烽罷舉息征塵，肆力耕耘屬幸民。
榆柳陰疎秋社近，緣邊笳鼓賽田神。

中秋從獵塞外

萬里清輝度塞寒，一輪飛鏡耀雲端。
穹廬影靜金波蘸，

行漏聲沉玉露溥光射龍沙明遠磧香飄仙桂拂層巒
普天今夕同忻賞何似趨承

膝下歡

金蓮花

菡萏敷鮮彩絢爛雲錦重茜裳雜縞袂擢艷白復紅根
株徧陂澤名品將無同昔傳天竺師鉢咒青芙蓉非闕
造物力色相自虛空獨有金蓮號圖譜考莫從我來古
塞北野卉競丰茸羅生巖谷底瑣屑焉能窮燦然覩奇

葩誰施冶鑄工六丁鼓爐鞴幾費丹陽銅鏤刻成千瓣
片片黃金鎔碧莖裊翠葉挺出薰風中儼如九品臺寶
絡垂玲瓏金仙此趺坐演偈降獰龍幽芳宜見賞輦路
會當逢亭亭黃屋側照耀街壁缸

宸遊每披拂香氣向日融願言植堦砌淨浥清露濃惜
哉遠難致忍令伍蒿蓬綴詞續花譜以冠羣芳藂

塞上晚眺

倒影餘霞麗晴沙入望平千峰含暮靄萬幕起秋聲度

龍牛羊下歸鞍雉兔盈割鮮將進酒邊月照高旌

雨後

涼雨晴偏好邊秋氣轉清虹從林杪斷月傍隴頭生落
葉飄含潤回沙溜有聲仰看羣鴈度寒影貼雲明

扈

駕幸檀柘寺恭紀

省耕郊外鳥聲歡敬從祇林擁八鸞法苑風飄花作雨
香溪水激石鳴湍含桃密綴紅珠樹嫩籜新抽碧玉竿

勝地從容駐清蹕慈雲鎮日護巖巒

看竹口占

林含虛籟扇清和翠篠娟娟浥露多結實成陰偏得所

幸邀

鸞馭數經過

御賜櫻桃恭賦

朱實纔春薦宮鶯啄未殘香堪齋蜜荔味自奪冰丸圓
轉珠千粒輕勻露一盤天厨欣惠賜絕勝駐顏丹

扈

駕觀麥

雨潤郊原奉豫遊勤民

御輦向西疇搖空翠浪沄沄起覆隴黃雲冉冉浮三白
降穰占歲稔兩岐擢秀應農謳佇看比屋連耒動擊壤
聲中麥有秋

曠然塵慮清

性靜涵真趣澄觀宇宙中未離人境外頓覺俗情空有

色穿簾月無心過竹風一聲長嘯罷俯仰浩靡窮

四時詠應

制

春

土融波暖遍陽春
睨晚雛鶯學語頻
嘉卉滿園爭獻笑
良苗接畛亦懷新
韶華有意留三殿
惠澤無邊及兆民
畿甸時巡東作始
康衢忭舞頌

堯仁

夏

麥黃節候屆朱明百草蕃滋萬彙榮檻覆槐陰當午密
階羅葵萼向陽傾濯枝雨過園林潤解愠風來殿閣清
一榻桃笙臨水畔對時育物豫

皇情

秋

碧天薦爽火西流序轉商飈應蓐收警鶴聲中清露下
征鴻影外斷雲浮梧楸蕭瑟宜新霽禾黍離披慶有秋

省歛順時勤

御蹕不耽清興宴瓊樓

冬

飄風發發迎嚴節瑞雪霏霏增暮寒
納稼三農休葭屋飛葭九陞肅郊壇
梅疎破臘開溫室竹勁凌霜挺玉欄
敬惜歲餘矜

聖訓忻依

內殿日承歡

癸未歲隨

駕南巡渡揚子江恭紀

敬從泛樓船春江二月天雲開孤塔迥風送遠帆聯津
柳迎

清蹕沙洲接

御烟中流回望處翠岫列晴川

癸未中秋對月時以疾假不獲扈從出塞感賦

十載中秋月都從北塞看祇今臨皎鏡遠愧隔

鳴鑾暑退身差健宵良意強歡當軒對罇酒重念

聖恩寬

皓月鑒丹宮

新秋爽氣滿瑤京駕瓦流輝一色明耿耿銀河低紫禁
溶溶冰鏡上丹楹素娥珮冷凌風響金桂香飄合殿清
但願千秋輪不缺團圓光彩對常盈

小園讌集

小園觴飲罷閒步碧溪頭嵐秀秋增色林深晚更幽同

吟今夜月回憶舊年遊風景真堪賞相携逐鷺鷥

德州曉渡

襟帶燕齊北路分舟梁曉渡馬嘶羣舉鞭南指峰如黛
佳氣龍葱結五雲

望岱

芙蓉萬仞插丹梯海上羣峰莫與齊九點青烟看野馬
五更紅日候天雞雲封峭壁松多古蘚積殘碑字未迷
冉冉嶺頭笙鶴下仙壇曾此降金泥

過蒙陰

望裡東蒙近微茫草樹遮面城峯礙日遶郭水鳴沙戶
盡綠桑繭人多摘茗芽曾聞魯酒薄村店一旗斜

扈

蹕閱河

聖主民依切金堤

玉輦臨平成齊禹烈底定慰堯心屢慶禾盈隴勤栽柳
結陰翕河今有頌鼓柷入歌吟

渡揚子江

臨江山勢鬱峇堯江面風和絮亂飄
錦纜解開揚子渡
龍旗飛過廣陵潮
重光麗日懸天鏡
幾道晴虹駕海橋
一曲汾歌懷

帝德榜人齊唱擁蘭橈

金山夜泊遇雨

宿募金山寺今方識化城
雨昏春嶂合石激晚潮鳴
不辨江天色惟聞鐘磬聲
因知羈旅境觸景易生情

其二

勝地饒佳致都教一雨收風掀高樹吼江疊怒濤流坐
久雲徐歛宵深象始幽暫時煩慮息我亦欲勾留

登焦山上方口占

浩浩天邊水蒼蒼山頂松老僧禪定後隔岸一聲鐘

雨中泊舟楓橋遙對虎阜

維舫楓橋晚悠然見虎邱塔標雲影直鐘度雨聲幽僧
舍當門竹漁家隔浦舟茫茫吳越事都付與東流

扈

駕幸西湖

宸章璀璨麗湖軒映帶烟波羽衛屯山入

御筵青未了草迎

蹕道綠方繁暮巢鷓鴣歛雲間翅遠寺僧歸月下門花柳
六橋爭爛熳齊承

睿日似春溫

世宗憲皇帝御製文集卷二十三

欽定四庫全書

世宗憲皇帝御製文集卷二十四

詩 雍邱集

五倫圖歌

天樞位地維張人於其間叙倫常五者闕一斯不可上
自朝廷下閨房豈止含齒并戴髮凡有血氣秉彝良試
看翩幡衆羽族接翼引隊朝鳳凰鳳凰高據碧梧儼臨
御君臣禮數何煌煌鳴鶴在陰其子和仙音嘹唳松風

長夫婦唱隨諧琴瑟雙飛雙宿雙鴛鴦可憐鵲鴿至翾
細往來在原集復翔行拙雅有急難意同氣兄弟期相
將緬彼新鶯向春柳金梭織翠為底忙聞聲相悅求其
友臨風百轉和笙簧感茲羣鳥義可取從明五教敷條
章丹青之筆此足貴等閒花草徒芬芳非惟滿紙絢文
采良禽指點醒頑狂若人立志慕忠孝須懸此圖出入
瞻玩無相忘

山氣日夕佳

巖銜斜照澹雲收翠靄參差晚更幽心靜隨緣皆自得
情空何事可關愁烟鬟碧染蒼茫暮霜葉紅飛爛漫秋
此際若逢陶隱士更邀明月續佳遊

百籟坐自吟

颯然一派起秋林相和無人竟夕吟落葉蕭蕭聲乍隱
懸泉漉漉響堪尋悠揚豈似臨風笛斷續非關搗練砧
默坐寂寥聽不厭恍於靜裏得空心

秋日隨

駕郊外駐蹕遇雨

村莊駐輦省農田共慶西成惠澤宣雷繞千峰明遠電
雨傾四野響飛泉博山香爇餘煙裊龍井茶敲活火煎
幾杵鐘聲雲外杳頓令心地覺超然

御題松鶴圖恭紀二首

松

通身鱗鬣作龍文翠色參天半入雲
天筆普垂新雨露一株獨向殿前分

鶴

頂染丹砂縞素衣
青城何日復招歸
一時墨妙邀

宸賞千古名傳
丁令威

趵突泉應

制
限七陽韻

歷下重臨羽旆揚
名泉漾漾麗池光
拂開玉鏡涵天影
看湧銀濤噴雪香

睿藻昔曾懸日月
恩輝今又照滄浪
溫然乳液通靈脉

派引陽和浩劫長

珍珠泉應

制限八庚韻

珍珠舊有名官署一泓明

泉在巡撫署內

似沸光靡定無風浪

自平流長知物潤源潔覺心清兩度邀

宸賞澄泓荷寵榮

萬壽頌三章

玉殿班齊捧

御筵千官歌祝筭綿延籌添甲子逢初度椿紀千支慶
永年遠貢越裳重九譯來朝絳節會羣仙更張內宴簾
高捲疊奏雲韶響徹天

其二

紫禁春深麗景融熙然身入慶雲中瞻

天有喜趨承近祝

聖無疆拜舞同毫覆

堯眉含秀采神凝

舜目烟方瞳生成竒表占徵應共指南山比壽崇

其三

南極星明耀蔚藍壽昌有象瑞光含聲傳中嶽聞呼萬
絃鼓虞廷度曲三日月升恒

皇祚遠海河清晏

聖恩覃捧觴戲綵春長好歲歲慚無貢旨甘

溪水碧於草

傍澗尋花去沿堤步翠行誰將芳草色染得碧溪明衫

穀風中縐眉痕鏡裏生紅顏云易改可似水常清

山居自怡

生平耽靜僻每愛住深山百卉從榮謝雙丸任往還朝
廷容懶慢天地許清閒睡起三竿日仙蹤似可攀

今月曾經照古人

磨洗無從鑑更真清光一片自常新既然此地臨今夕
豈不當年照古人冉冉浮生成往跡茫茫世事總飛塵
會須直上清虛府永向蟾宮伴桂輪

幽居

小築幽居愛近郊，夜遲月色隱林梢。
寒侵珠箔燈光淡，風動紗牕竹影交。
野外鐘聲聞斷續，案頭詩律費推敲。
翛然兀坐情空盡，識得原無物可淆。

七夕

萬里碧空淨，仙橋鵲駕成。
天孫猶有約，人世那無情。
弦月穿針節，花陰滴漏聲。
夜涼徙倚處，河漢正盈盈。

即事

晚行西郭外策馬上層岡暑退無多日疎林已半黃

一日閒

閉門一日隔塵囂深許淵明懶折腰觀奕偶將傍著悟
橫琴只按古音調新情都向杯中盡舊慮皆從枕上銷
信得浮生俱是幻此身何處不逍遙

就正齋九日賞菊

得七陽

重陽高會幔亭張堦下寒英正吐芳為羨霜叢矜晚節
同來香徑領秋光嘉賓落帽風流在綺席徵歌雅興長

却笑當年彭澤叟東籬寂寞獨傾觴

寒夜有懷

夜寒漏永千門靜破夢鐘聲渡花影夢醒回思記最真
那堪夢短難常親兀坐誰教夢更添起步修廊風動簾
可憐兩地隔吳越此情惟付天邊月

山居偶成

山居且喜遠紛華俯仰乾坤野興賒千載勲名身外影
百年榮辱鏡中花金樽潦倒春將暮蕙徑葳蕤日又斜

聞道五湖烟景好何緣簑笠釣汀沙

途次暑雨

泱泱夏雲屯滂沱塞雨繁繞渠沙路淨注澗石泉
渾鶴浴依邱垤駝鳴傍水源涼颼起林末吹入小行軒

山頂船樓

樓居製倣船居好山檻風如水檻多飄渺千峰翻翠浪
怒號萬木吼蒼波晴霞片片開帆影禽鳥聲聲唱棹歌
閒拄一篙雲外泛青松白石任吟哦

中元登獅子嶺感懷

晚登獅子嶺四望淨雲烟葉落瘦崖樹雨過響澗泉人
顏移歲月秋色老山川令節須酬賞天空月正圓

妙高堂

碧峯頂上結茆廬可擬巢由物外居雲變白衣眼底事
風翻貝葉案頭書性天融會無今古心月圓明徹太虛
睡起北窓時一嘯千山答響自如如

早起寄都中諸弟

曉起輕寒透薄帷
風光節物暗推移
正當邊塞秋臨早
況是關山月落遲
一鴈孤鳴驚旅夢
千峰攢立動詩思
鳳城諸弟應相憶
好對黃花泛酒卮

熱河間詠七首

塞北開行殿
窓臨萬壑松
雲封雙塔嶺
烟鎖磬鍾峯
飄渺層巒接
盤迴曲徑重
紅塵難到處
何事不從容

其二

一人臨塞北
萬里息邊烽
朽木含生意
閒花逞冶容
夔

魑潛隱跡虎豹盡藏蹤羣動無紛擾惟聞響梵鐘

其三

避冗原無意搜奇念久灰境幽饒野趣山靜絕浮埃
馴鹿時來去閒雲自往回長年順養得何畏景光催

其四

卜居豈為避三庚巖壑幽深氣象清絕頂蒼松多古韻
前川皓月倍常明薄衾坐擁渾忘我高枕歌吟別有情
萬籟寂然銀漢轉一聲破夢曙鐘鳴

其五

泠泠碧澗勝絲竹疊疊蒼宮列畫圖異卉手拈陳几案
野蔬親摘付庖厨閒中隨展經千頁睡起新烹茶半壺
莫謂超然解遺世廟堂清福一情愚

其六

山深地僻塵囂隔斜陰茆堂百尺松石壁有斑憑雨鑿
柴門無鑰倩雲封盤巖曲磴留麋跡繞砌平沙印鶴蹤
夢覺南牕何所事獨吟獨酌儘從容

其七

閒來忘暑兼忘我，浩氣冲融貫太虛。
城市山林君子宅，山林城市帝王居。
不尋仙客談元旨，懶覓高僧講梵書。
天地古今惟一嘯，悠然自得有誰如？

恭謁五臺過龍泉關偶題

隔斷紅塵另一天，慈雲常護此山巔。
雄關不阻驂鸞客，勝地偏多應跡賢。
兵象銷時崇佛象，烽烟靖始颺爐烟。
治平功效無生力，贏得村翁自在眠。

將至五臺山月下作

深沉院落隔驚塵夜靜高懸月一輪
芍藥欄邊藏祖意葡萄架裏露天真
契機且共論詩酒忘我何妨互主賓
聞說臺山驀直路明朝不必問前津

仲秋有懷

翻飛庭院葉初乾悵悵難禁獨倚欄
兩地西風人夢隔一天涼雨鴈聲寒
驚秋剪燭吟新句把酒論文憶舊歡
辜負此時曾有約桂花香好不同看

秋夜直院

碧落沉沉蠟炬寒
清秋直院夜將殘
金吾禁肅千門靜
玉漏聲稀列宿闌
宮樹半籠蟾影澹
天街欲濕露華溥
垂簾兀坐心如
水此際憑誰舉
話端

世宗憲皇帝御製文集卷二十四

欽定四庫全書

世宗憲皇帝御製文集卷二十五

詩 雍邸集

長至日

候琯灰初動
瞳矐旭日臨
晴光金闕迴
佳氣帝城深
子建三微首
功添一線陰
靜觀消長理
不息見天心

梅花二首

步林和靖韻

冰蕊舒芬臘欲殘
香魂脉脉自凌寒
先春不借東皇力

冒雪惟容隱士看素面濃嫌梨粉艷仙標狂鄙柳綿乾
玲瓏鐵榦珠光映宛若疎星傍晚闌

其二

開蓬寧逐雪消殘歲底曾經徹骨寒未識芳心何處託
欲將冷眼向誰看飲餘含笑香微吐暖入凝酥暈不乾
一種天然清意味每牽幽賞到更闌

松

矯矯拂雲姿能教衆木卑蒼鱗疑挾雨翠鬣靜含颼花

暖飄香粉膏流結紫芝千齡待黃鶴集此最高枝

竹

綠染竿竿潤青籠个个陰節高寒愈勁氣潔暑難侵密
雨驚龍起清風引鳳吟幸邀君子號為爾解虛心

梅

瘦影亭亭立幽香細細清竹希霜後操松訂歲寒盟先
得東風意猶含太古情超然羣卉外一味澹為生

元旦

輝輝燈火曙光連
氣淑風條景物鮮
雙闕禁鐘鳴朔旦
千門春帖迓芳年
金花雜組新裁勝
栢葉清樽喜侍筵
仰戴

聖皇康且壽
長朝元節沐

恩偏

春日閒行

清旭籠雲暖氣含
遠山如黛水如藍
啼鳩到處青桑隴
乳鴨誰家碧柳潭
公子醉鞭金勒騎
佳人笑摘野花簪

春光駘蕩東風緩蜂蝶悠揚晚更憨

園居二首

晴暉蕩林翠芳岫映春漪燕怯飛還歇鷗馴信可期
異書探古字真蹟辨藏碑晚更携蘭棹溯洄月上遲

其二

懶問浮沉事閒娛花柳朝吳兒調鳳曲越女按鸞簫
道許山僧訪碁將野叟招漆園非所慕適志即逍遙

風

皖影悠揚五兩輕
少男應律蟄蟲驚
破萌拆甲全無跡
拂幔開楹若有情
草偃方將行夏令
條鳴切莫變秋聲
松濤竹籟俱堪賞
雪後飄梅韻更清

花

深淺穠纖萬種姿
愛花自古有情癡
書窓艷入紅牙管
粧鏡嬌添綠髮絲
韋曲千芳初放日
洛陽群卉正當時
若將解語朱顏比
爭似長年錦滿枝

雪

誰把冰綃細剪裁絮飄軒檻粉鋪苔千山種遍峯峯玉
九陌開齊樹樹梅鶴擎離披驢背詠漁簑冷淡鴨頭回
驟驚擬赴瑤池宴飛舞瓊花入酒杯

月

體空質妙稟陽輝一鏡明能徧九圍冷伴畫樓吹玉笛
清臨香閣理金徽纖纖柳外星光隱寂寂花間燭影微
獨有滄江烟浪裏扁舟載得滿輪歸

池邊

齋居讀書暇晚向池邊步水面落花浮水底行雲度山
色從西來泉聲日東注靜觀物何閒超然得妙悟

花前

小園目眩攬羣芳紅紫成帷錦繡張次第迎風爭獻笑
參差向日各分香無名也自矜韶節入品方堪逞艷陽
抱蕊攢英蜂與蝶何曾解得惜春光

清涼紀遊一十四首

入山

清涼境界梵王宮碧染芙蓉聳昊穹萬古雲封五頂寺
千株松納四時風盤迴鳥道珠幡裏繚繞爐烟畫障中
石立儼然如接引疑逢青髻化身童

東臺

嵯峨東陟挿雲峯壁翠巒蒼亘百重妙吉祥師常說法
那羅延窟慣藏龍遠窺滄海初升日響振空林欲曙鐘
一派明霞光絢爛天然佛鏡豁心胸

南臺

歸然秀拔峙南臺頂勢穹窿若覆盃香閣遙瞻烟鎖處
寶燈聞說夜飛來仙巖鋪錦憑誰繡虎窟屯雲為我開
欲禮真容先在望頻催前騎躡崔嵬

西臺

掛月巖前一徑探岩堯紫翠疊烟嵐圓機風與溪相答
秘義人同石共譚靈異蹟多難罄筆清涼峯好盡如簪
無邊覺海毫端入八水源頭不用參

西臺有八功德水

北臺

北臺秀矗斗杓傍樓殿凌虛結上方衆壑俱從簷下落
萬緣都向檻邊忘洪河如帶明分野恒嶽為鄰接大荒
世界三千空色喻豈離般若一毫光

中臺

五朶青蓮簇翠鬟
栽栽一朶湧中間
近來若個宗風徹
至此方知佛日閒
採菊梵仙歸洞去
踏花獅子自空還
法身寶塔門門現
畢竟遊人未到山

真容院

殊像原無二莊嚴屬畫工昔聞叱牛叟今見跨獅翁月
面光瑩玉珍纓貫慧風真容從未隱謾道現虛空

清涼石

光寒如鏡卧深雲半是雲斑半蘚紋誰識方方一片裏
古今容盡屐交紛

其二

體本清涼自解煩天然秀色蓄雲根曼殊說法今何在
叅客空尋趺坐痕

過清涼山諸寺

祇林幾處隱松關
門帶寒溪碧玉灣
歷叩花宮尋白足
遍登香閣看青山
無塵覺地猿能定
不繫禪心雲共閒
一片清涼蒼翠色
家家分得滿窓間

出山途中口占

路轉層臺樹幾重
綠陰如幄護金容
行從琪草瑤花過
衣染生香百和濃

其二

日射關門宿霧開
化城咫尺首重回
仙雲片片隨行騎
直自清涼山頂來

射虎川臺麓寺

精藍鬱起碧巖幽
此日齋誠駐紫騮
東指鳳城雙闕迥
西瞻鷲嶺半空浮
梵鐘縹緲香雲外
寶翰昭回古殿頭
神表天弧開淨域
河沙浩劫頌宸遊

宸遊

再度龍泉關

遨遊從淨土安穩度香城烏亦通禪悅松如響梵聲山
嵐朝夕幻關柳去來迎鳳闕慈雲近惟殷問

寢情

熱河道中

山色嵐光映馬韉軟沙細草緩鳴鞭花開遍野時飛蝶
雲散晴空好射鵞孤店酒帘飄柳外幾家溪水遶門前
穿林暮返携鋤叟畧約歌斜度晚烟

湖亭觀荷

館宇清幽曉氣涼更宜澹蕩對烟光湖平水色涵天色
風過荷香帶葉香戲泳金鱗依密荇低飛銀練貼芳塘
蘭橈折取憐雙蒂殊勝陳隋巧樣粧

河燈

月湧湖心白燈燃湖面紅琪花開色界電彩燦虛空棹
泛明河裡人遊列宿中蘭舫鳴梵唄飄入藕花風

田家四時詞

六言

春

陌頭楊柳初放溪上桃花欲燃處處青鳩呼雨家家黃
犢耕烟牧童羣嬉挑菜餉婦自解撐船借問浪遊城市
何如樂業村田

夏

帶露葉盈蠶箔翻雲麥熟田家白水千塍秧馬綠陰幾
戶繰車日午鳴蟬遠近風薰飛燕橫斜男女適均勞逸
相逢只說桑麻

秋

風露微涼天氣四鄉一派秋光
蕎吐東阡雪白禾香南畝雲黃
青川園蔬足雨紅收林實經霜
舉室欣逢樂歲商量築圃登場

冬

靄靄炊烟茆舍霏霏臘雪柴門
闌靜閒眠羔犢籬牢安穩鷄豚
夜織梭鳴啞軋朝春杵韻喧繁
賽社爭撾祭鼓歌呼新釀盈盆

亭上

幽亭臨玉沼芳草帶金塘石疊玲瓏巧花飄桂萼香油
雲翻濕影絲雨濺虛涼倚檻紆流覽天容蕩水光

閏中秋

一年最是中秋好八月欣逢兩度過彩耀桂輪前夕滿
涼生玉露此時多

是日
交節

入簾喜若重來客照席歡宜續

舊歌自笑閒情誰得似漏深更戀賞金波

大覺寺

翠微塵外境峯壑畫圖成寺向雲邊出人從樹杪行香

臺喧鳥語禪室遶泉鳴日午松陰轉鐘傳說偈聲

月夜泛舟

隄柳陰分舉畫橈數聲嘔軋蕩輕舠芙蓉館北香浮沼
桑柘村西月滿橋雪鳥衝烟孤鷺起金鱗破浪巨魚跳
溯洄一片清光裏心會南華秋水謠

秋夕

初月明樓角微風動樹條夜涼蟲語細秋老雁聲驕息
慮徵神爽忘懷覺境超陰陰深竹裏時見一螢飄

九日

九日秋容老山山晴色宜紫萸香可佩黃菊艷當時屐
為登高著尊因選勝移願言多載酒拂石醉題詩

黑龍潭

平麓蟠崇阜雲潭結澗阿鏡光涵鐵冷溜響噴珠多秘
識龍藏穴深疑蜃蛻窩農田望霖雨於此乞恩波

擬漁樵耕牧四首

漁

金匱要略卷之二十一
卷二十一
舴艋漂搖隨處家一篙綠水度年華風罾逐浪蘋溪遠
雨網衝烟柳渚斜在在耽閒盟白鷺朝朝買醉饌紅蝦
團圞兒女歡篷底豈羨浮名舉世誇

樵

一生蹤跡在烟霞不植條桑不種麻翠栢斫來青帶葉
古藤擔去紫垂花歌長時引猿窺穴歸晚常乘月到家
笑指雲山為活計那須卮酒祝篝車

耕

茅屋踈籬翠蔓牽繞籬桑拓翳平田村中斑白閒無事
隴上青黃喜有年比戶機梭鳴月下一家兒女聚燈前
那能更羨公侯貴蟹美魚肥稻熟天

牧

平原淺草澹烟和指點牛羊下綠坡逐隊飲時泉響細
偷閒卧處柳陰多長河曲岸悠揚笛斜日微風斷續歌
借問道傍騎馬客何如犢背穩披簑

四花詞

桃花

玉洞仙葩絳露滋纖濃早占仲春時
群芳奪色朝霞艷向日先開第一枝

荷花

綠蒂紅衣薄醉妝凌波舒影覆鴛鴦
蓮房有子心偏苦藕節含香絲更長

桂花

月殿珠英綻嫩黃婆娑翠葉隱微霜
為含貞性能長潔

獨向秋風壓衆芳

梅花

綽約瓊姿澹自真
清標冒雪倍精神
不同羣卉爭妖艷
一種寒香最可人

元夕過僧寺

步入東林月滿壇
逶迤曲徑遶平欄
禪心清淨塵心遠
燈影幽微磬影寒
香煑玉泉分茗椀
靜依寶筏坐蒲團
廟堂不繫偷閒客
得向宗門舉話端

初春郊行

土膏開動草芬芳，緩轡循行十里塘。
細雨斜飄山漸綠，小桃半吐柳初黃。
閒隨戲水沙鷗狎，又見營巢海燕忙。
寓目物情忻自得，良辰倍覺惜韶光。

臨軒寓目

綺窓罷撫紫瓊琴，香燼金爐鶴夢沉。
多事草偏名醒醉，可人花解結同心。
風翻曲沼千層碧，雲過重簷一霎陰。
欄外有情雙蛺蝶，翩翩飛入海棠深。

三春景物滋

陽春百物向榮時
况復郊原雨露滋
黍稷青麻翳隴
桃紅李白杏交枝
遊蜂舞蝶紛紛戲
乳燕鳴鳩處處宜
幸際

聖皇熙皞世佳辰
若負便為癡

睡起

小齋岑寂漏聲遲
書卷香爐得自怡
花不識愁工巧笑
柳恒如醉類情癡
夢回窓隙風翻帙
光動簾鉤月映池

靜裡陶然清興劇苔牋石墨坐題詩

柳絮

棟花風過雪霏霏萬點沾衣不濕衣輕逐東西香轂轉
狂隨來去馬蹄飛河橋漠漠迷漁艇村店紛紛撲酒旗
巧入疎簾如有意拂琴飄卷伴書幃

春深閒居

長日愜幽棲軒窗面小溪雲開徐自歛鳥歇又重啼愛
水頻垂釣看花偶一題坐憐春已暮望裡綠陰齊

詠牡丹

酣艷枝枝五色妝
難將蘭麝與論量
欲留春住舒奇彩
獨擅嬌多領衆芳
天女霞冠簪寶髻
仙姝玉佩曳霓裳
瓊漿飲罷瑤池宴
雙頰潮紅膩粉光

新綠

昨樹花多葉今看葉勝花
翠含新色嫩綠重午陰斜
露景鳴乾鵲烟光亂乳鴉
最宜初夏候掩映碧牕紗

寓目

漠漠雲無際
茸草漸瘳花繁從徑窄
溪漲覺橋低
捎蝶巢梁燕
啣魚沒浪鵝
偶來松下坐
斜倚看澆畦

詠榴花

春芳零落絳英佳
獨茂薰風正色諧
翠葉布陰新綠染
蕊珠吐艷密紅排
石家擊碎珊瑚樹
趙燕攢成瑪瑙釵
好是一花生百子
中含瓊液笑當階

午日

綠菖青艾絳紗囊
菰葉堆盤解粽香
競渡楚人傳故事

賣符道士弄靈章
葵心向日擎枝麗
榴火燒雲並蒂芳
拂拂薰風初試葛
華軒揮扇引蒲觴


池上待月

水含夕籟靜余亦澹懷
空星彩低穿樹花香暗度
風初看幽徑白漸露小橋
紅行到天心處清光更不同

雨後園亭即景

玉溪宛轉雲流鏡
翠巘參差黛掃屏
堤樹風翻深淺葉
徑苔雨染淡濃青
鳴琴遙和巖頭瀑
涼箔齊鉤水面亭

最是夜初羣籟寂臨軒坐擁一湖星



世宗憲皇帝御製文集卷二十五

欽定四庫全書

集部

世宗憲皇帝御製文集卷二十六

臣永琰恭校

侍讀臣孫球覆勘

覆校官主事臣李駿

校對官主簿臣郭祚熾

謄錄監生臣劉紳

欽定四庫全書

世宗憲皇帝御製文集卷二十六

詩雍邱集

荷花

裊裊搖波碧
亭亭映日紅
芳能消暑氣
秀獨占薰風
翠遮塵蓋莖
香勸酒筒仙
姿時一挹
清潔與心通

夏日樓前

柳布濃陰覆釣磯
樓前翠嶂綠成圍
驟過白雨長虹見

點破青天一鳥飛閒處方知塵事擾靜中始悟道機微
不煩驅暑搖團扇水面風生透葛衣

七夕

沉李浮瓜乞巧筵銀河今夜渡仙輶駕鶴樓看霞成錦
翡翠屏開月上弦滴露梧桐秋影薄凌波菡萏晚香鮮
綵盤鍼線年年事一瞬歡期萬劫緣

再過大覺寺

一徑烟蘿夕照深山窓幽竹更添陰老僧譚法揮松塵

異鳥啣花飲雪襟

山中有白鷺

閣響鐘聲傳密義潭空雲影

鑑禪心頻來端愛風泉潔却向無弦聽好音

喜晴

陰翳看銷盡晴光喜滿局雲歸天湛碧雨過樹餘青癡
蝶深藏蕊遊魚戲逐萍無塵憐淨几偶一閱金經

秋夕泛舟

芙蓉吐艷溥清露楊柳垂條曳晚烟幾點鳬鷺驚畫梁
一湖風月載蘭船棗懸碩果心皆赤芡劈香包實本圓

攬得秋光遊興劇清宵景物倍鮮妍

中秋

雲斂星疎淨碧穹月圓今夕正秋中十分明照三垣徹
一片光含萬象同樽泛金波涼灩灩花浮玉露濕濛濛
恍疑夜半聞仙樂滿院香飄桂子風

園景十二詠

深柳讀書堂

鬱鬱千株柳陰陰覆草堂飄絲拂硯石飛絮點琴牀鶯

嚙春枝暖蟬鳴秋葉涼夜來窻月影掩映簡編香

竹子院

深院溪流轉迴廊竹徑通珊珊鳴碎玉裊裊弄清風香
氣侵書帙涼陰護綺櫳便娟蒼秀色偏茂歲寒中

梧桐院

棹泛灣灣水橋通院院門吟風過翠屋待月坐桐軒秋
葉催詩落春花應節繁祇應金井畔好借鳳凰騫

葡萄院

紆迴深樹裏一水暗通舟乳汁香魚潤冰丸滑欲流陰
鋪青葉護架絡翠藤稠西域傳奇種園丁獻早秋

桃花塢

水南通曲港水北入迴溪絳雪侵衣艷蘋霞遶屋低影
迷棲棟燕聲杳隔林鷄檻外風微起飄零錦墮泥

耕織軒

軒亭開面面原隰對畇畇禾稼迎窓綠桑麻罕地新簷
星窺織火渠水界田畛辛苦農蠶事歌詩可繫幽

萊圃

鑿地新開圃因川曲引泉碧畦一雨過青壤百蔬妍潔
愛沾晨露鮮宜潤晚烟倚亭閒佇覽生意用忻然

牡丹臺

疊雲層石秀曲水繞臺斜天下無雙品人間第一花艷
宜金谷賞名重洛陽誇國色誰堪並仙裳錦作霞

金魚池

甃地成卍字注水蓄文魚藻映十分翠欄圍四面虛泳

游溪漲後潑刺月明初物性悠然適臨觀意亦舒

壺中天

峯峻疑無路雲深却有扉鶴閑時獨咲花靜不輕飛洞裏春長駐壺中月更輝一潭空似鏡碧色動簾衣

澗閣

平橋依麓轉一帶接垂楊閣峻橫雲影欄虛漾水光度香花外厦挹翠樹西廊倚檻看飛鳥披襟引興長

蓮花池

雲錦漣新露紛披映柳塘淺深分照水馥郁共飄香
安美天然潔波清分外涼折花休採葉留使蔭鴛鴦

扈從水圍觀獵

河冰初泮候鳧雁集春灣號令明蒐獵威儀肅

聖顏禽從星箭落

恩自御舟頒圍罷

皇情豫歡騰鸛鷺班

秋獮扈

駕

玉帳秋風勁
朱旗霜野開
千屯瞻鳳葆
萬騎待龍媒
犬疾追狐竄
弓鳴逐鹿回

天顏微一笑
歡動震如雷

侍

駕景山觀殺虎

山擁黃扉壯
林開碧殿隈
雄風生虎腋
腥霧襲龍衣
血濺瑯玕勁
弧張利爪摧
桓桓爭奏技
斂手有餘威

湯泉

凌雲蘭殿鬱崔嵬繞檻連漪溫液迴養正為能恒淨潔
瑩心不止盪氛埃宿舍炎德珠光潤只覺陽和澗底來
著績豈徒堪愈疾溶溶一脉萬年開

上元

玉宇沉沉夜花陰皓魄升畫欄凝瑞靄綺席上春燈笛
引歌聲疊衣翻舞袖層任教蓮漏促莫負酒如澗

清明

春雲鵲鵲罨重城二月天容逗嫩晴雪盡柳條青可折
寒消桃蕊絳初成誰家新燕低飛影何處歸鴻晚度聲
窻外好風罇內酒鑽榆取火又清明

春日

獨有東風擅剪裁朱朱白白後先開鳥因枝密潛身隱
蝶為香多作隊來紫陌笙歌喧陸海青郊車馬動春雷
更歌曉枕尋殘夢何事林鳩故故催

初夏扈

蹕熱河

行苑留仙蹕層巒儼赤城煙光濃樹色暑氣散泉聲地
僻花偏艷山深夢亦清瞻依忻

聖豫風物慰

皇情

獅子園夏日

石屋荆扉枕翠崗烟巒朝夕鬱丹蒼碁敲綠樹陰中局
酒泛紅薇架下觴珠箔晝搖新竹影玉池晚送嫩荷香

居間漫謂全無事一榻臨風蝶夢長

山亭

蔦蘿滿樹帶烟垂
節月梳風作幔幃
流水似琴還似筑
青山宜畫又宜詩
飢飈竊果緣枝捷
乳雉呼羣出草遲
獨倚石欄舒遠目
亭前幽谷起雲時

畫欄

薰風披拂畫欄東
照眼榴花爛熳紅
暑氣不侵松閣內
清陰長在竹窓中
由來邱壑情堪寄
即此蓬瀛路可通

次第藥階香晚露纖纖新月上梧桐

美人把鏡圖四首

手摘寒梅檻畔枝新香細蕊上簪遲翠鬟梳就頻臨鏡
只覺紅顏減舊時

其二

曉妝髻插碧瑤簪多少情懷倩竹吟風調每憐誰解會
分明對面有知心

其三

竹風颯颯振琅玕玉骨稜稜耐峭寒把鏡幾回頻拂拭
愛他長共月團圓

其四

曉寒庭院閉蒼苔妝鏡無聊倚玉臺怪底春山螺淺淡
畫眉人尚未歸來

美人展書圖二首

丹唇皓齒瘦腰肢斜倚筠籠睡起時畢竟癡情消不去
綰編欲展又凝思

其二

小院鶯花正感人東風吹軟細腰身
拋書欲起嬌無力半是憐春半惱春

題墨竹一十二首

毫端風雨集竹石氣蕭森葉葉香
含潤枝枝影結陰珍同雲母賞儼對越王吟

雲母大竹也嚴州產越王竹生大石上

展卷題新

墨清飈欲拂襟

其二

摹寫新篁致不群臨風嫋嫋墨花芬嫩梢已具凌霜節
纖葉初開个字文粉綠淨含情冷澹烟蒼乍拂翠紛紜
蓬萊何必浮筠籜始引仙鸞下喬雲

其三

為愛清臞訂素交一林寒玉受風敲名傳嶰谷從今炫
富遜淇園任笑嘲

其四

曾聞渭川千畝竹露梢霜節連雲綠又聞湘江竹最佳

龍形鳳尾凌空矗自昔江南好事家
白樓謝館分苗族
竿竿碧玉戛吟牕
枝枝濕翠侵書屋
風晨雨夕韻堪聽
月色烟痕清可掬
蕭閒自不染塵氛
淨掃浮華媚幽獨
東坡居士曾有言
不可無竹寧無肉
畫師惟數湖州翁
興來愛寫簷簷谷
對此長莖復短莖
寒碧精神光奪目
葉不因風長欲動
恍然有聲溢紙幅
頓教爽籟發衣襟
舉觴一酌春生腹

其五

淡濃十葉五葉高下一枝兩枝瘦影娉婷綽約春烟好
為扶持

其六

宜傍幽人宅饒多處士風清標與高節長耐歲寒中

其七

衆卉爭穠艷修筠晚色蒼嚴冬貞耐冷永夏澹生香鳳
實含霜稔龍孫帶雨長祠猶傳遯水斑尚記瀟湘獨抱
中虛質堅持歲暮芳松高隣最洽梅潔配堪當時引清

風至頻來好鳥藏
陰塔紛翠黛敲戶響
琳瑯叔夜貪留屐
劉伶對舉觴
興增詩裏興影蕩石邊牀
淨植寒泉畔移從古澗傍
截竿宜把釣織簾可招涼
筆底何奇絕烟雲萬斛量

其八

我亦愛修竹手植滿萬竿
春叢抽新碧夏葉生嫩寒
更宜當素秋蕭蕭舞檐端
乃至入元冬蒼然秀可餐
帶露裛神光遲月弄夕興
烟雨快逸情風雪聽幽響
能備四

時好永結平生賞
構屋豁軒墀面面曳風枝
開窓張素琴鑿池懸釣絲
為緣情好薦寤寐懷清姿
寫真驚墨妙灑然涵幽芬
似我園中籜綠霧凝蒼雲
為詩歌此君聊以述所忻

其九

凌雲勁節堪延賞
應物虛心更可師
曲折欄邊千萬籜
蕭疎籬畔兩三枝
偏饒素士清高致
雅具間僧冷淡姿
倚檻修容經雨沐
陽簾弄影被風篩
能令白傅牽詩興

不使希公笑墨癡愛此縱橫揮滿紙于今妙手勝王維

其十 三五七言

玉个个翠重重一灣流水北雙板小橋東竿短竿長皆
入畫枝疎枝密總含風

其十一 菖竹三章章三句

瞻彼菖竹有節其直惟君子之式兮

瞻彼菖竹有葉其森惟君子之馨兮

瞻彼菖竹有實其繁惟君子之殄兮

其十二 四言

青青翠竹在淇之澳其臭維馨其潔若沐簞簞修篁載
茂瀟湘慕彼清風移植我堂娟娟綠筠在渭之濱置我
軒戶淡交以親亭亭鼓玉可以濯俗筆墨靈竒寫以相
属

題畫扇

漱灩春波十丈高水光山色入輕舠從來不借推移力
只待東風長翠濤

贈羽士二首

身在蓬瀛東復東
道叅天地隱壺中
還丹訣秘陰陽要
濟世心存物已同
朱篆綠符靈寶錄
黃芽白雪利生功
一瓢一笠浮雲外
鶴馭優游遍泰嵩

其二

羽帔翩翩冷御風
醮章長達上清宮
化龍有技蒼雲繞
跨鶴無心顥氣通
玉屑駐顏千歲赤
丹砂養鼎一爐紅
真機妙諦因師解
何必羅浮訪葛翁

皇父御極之六十年歲次辛丑元日群臣上

壽恭頌

歷綿花甲周還始運行鴻鈞祝祚昌虞樂和音踰百獸
堯圖應律洽三陽壽齊天地占悠遠恩重

君親慶永長今日班衣聯劍佩年年同此奉霞觴

碧霞祠題寶旂步虛詞

寶閣冰簾紫靄籠仙風裊裊拂旂紅扇開日月飛雙鳳
座繞星辰列九宮子視群蒙敷惠澤母臨率土荷帡幪

敬將玉帛當庭獻願普慈光遍域中

其二

瓊宇璇宮日月長奇花瑤草總飄香琉璃作殿蒼龍衛
雲霧裁帷青鳥翔拂露霓旌珠燦爛御風鸞駕玉鏗鏘
常將天福人間錫獎孝褒忠佑萬方

書扇與僧

綠陰垂永晝人靜鳥啼烟脫網游金鯽翻階艷石蟬無
心猶是妄有說即非元偶值朝來暇留師品茗泉

秋興四首

商飈瑟瑟動遙林，萬里天長白雁吟。
綠柳葉凋三徑翠，黃花蕊綻一叢金。
炎涼相代成時序，日月頻遷變古今。
不厭看雲樓上坐，秋雲鮮作最高陰。

其二

粼粼碧水畫樓東，蓼葉蘋絲錦滿叢。
葦放花搖雪白，疎林垂實帶霜紅。
幾番涼送梧桐雨，一陣香飄桂子風。
轉眼園亭秋色改，明霞爛漫映丹楓。

其三

天高氣肅夜淒清
倚遍欄杆花外曲
光吐銀蟾箔捲珠
香浮金鴨筆鏘玉
吟風爽籟自成音
應候鳴蛩誰迫促
獨愛海棠紅上階
漏深似為燃明燭

其四

丹葉迎暉明遠樹
碧雲被野迷孤鶩
霜澄潦水宿塵空
木落秋山真面露
酒泛紅螺月檻開
歌翻白紵風簾度
清幽光景最佳時
遊目騁懷誰共賦

柳月

鴛鴦樓外柳條長，斜挂如鉤吐練光。
恰似粧臺風鬢亂，青絲閒理玉梳涼。

梅月

梅花幾樹玉玲瓏，香度黃昏細細風。
新月彎環枝上映，素娥飛入蕊珠宮。

松月

翠鬣蒼鱗千尺松，月光籠樹樹光濃。
恍疑戲水虬龍出，

天矯擎珠上碧峯

竹月

蕭蕭疎映月昏黃
浥露凝烟暈素光
陰轉粉牆鋪翠影
湖州新寫墨簷簷

梧月

梧舒新翠接檐深
潔潤偏宜好月臨
一片清光枝影瘦
綠窓人靜擬秋吟

山月

林深鳥宿夕烟暝玉鏡揚輝不受局夜籟寂然群動息
一輪飛過萬山青

池月

半畝池涵天作底一番風過水流金驚看錦鯉如梭擲
織就橫紋綠綺衾

樓月

百尺樓高逼太清廣寒宮近接檐楹夜深玉笛穿雲響
應使姮娥夢裡驚

船月

夜泛輕舟一葉飛
長江圓壁湛流輝
清光肯令空狼籍
力挽蘭橈滿載歸

宴月

花月依依入暮春
坐花醉月綺筵新
始知蟾魄無私照
瓦缶金罇各一輪

寒夜

燒燭消長夜
經霜百草乾
風吹鶴夢警
月射劍光寒
東

磬傳清楚西鐘度紫壇

邸第有東佛樓西斗壇

新詩閒詠罷古鼎

熱沉檀

冬日潞河視倉

曉發啓明東金鞭促玉驄
寒郊初噴沫霜坂乍嘶風
百雉重城壯三河萬舶通
倉儲闕國計欣驗歲時豐

世宗憲皇帝御製文集卷二十六